


Awe ta Dia Internacional di Museo:

MUNDO HENTER CU E LEMA: "MUSEONAN, GENERADOR DI CULTURA"



ORANJESTAD (AAN) - Awe dia 18 di Mey ta Dia Internacional di Museo. Mundo henter ta enfatiza e dia aki, cu e lema "Museonan: generador di cultura". Aruba ta conta cu tres museo: Museo Historico Arubano situa na Fort Zoutman, Museo Numismatico situa na Zuidstraat (patras di Warda di Polis) y Museo Arqueologico den Zoutmanstraat.

Den e ocasion aki DIARIO ta trese dilanti un recopilacion di informacion tocante e Museo Arqueologico di Aruba, cual por cierto ta funciona den un edificio den mal condicion, y sin e espacio suficiente pa presenta e coleccion di obhetonan historico na publico, loke sinembargo no ta kita e personal nan voluntad pa sigui traha y duna e comunidad Arubiano e oportunidad di conoce mas di nan origen e identidad.

HISTORIA: Museo Arqueologico Aruba (MAA) a worde habri pa publico na aña 1981. E tempo ey e museo tabata parti di "Archeologisch

en Antropologisch Instituut Nederlandse Antillen (AAINA). E museo tabata muestra den su exposicion permanente, obhetonan di e periodo prehistorico (periodo prome cu e Spañonnan a yega Aruba), cualnan a ser haya durante excavacionnan efectua door di AAINA. Por ser bisa cu e instituto aki tabata encarga cu e parti cientifico/investigativo di arqueologia di Aruba y cu MAA tabata percura pa e informacion obteni durante e trabaonan di investigacion yega na e publico den forma di exposicion di obhetonan, foyeto, boeki, etc.

Na aña 1986, Museo a pasa na forma parti directo di Instituto di Cultura di Aruba, unda cu e trabaonan tanto investigativo como informativo riba tereno di arqueologia a bay forma parti di e trareanan di Museo Arqueologico. Na e taareanan aki a worde agreea esun di e preservacion di Aruba su herencia arqueologico.

